

## *U' PUZZU DA' SAMARITANA*

Caminava pi' strati da Samaria  
u' Signuri p'annari 'n Galilea,  
e 'rrivatu o' puzzi di Sicari  
s'assittavu supra nu muru pi' ripusari :  
era sulu e stancu u' Ridinturi.

Spuntavu na fimmina 'i dda cuntrata  
a' jinchiri l'acqua ca' so quartara.

“Dammi i' mbiviri, 'nci dissi u' Maistru”.

Dda poviredda ristavu di lignu :  
“no po' essiri, jò samaritana sugnu  
e l'acqua a nu gjudeu no 'nni dugnu”.

“Si tu sapissi cu ti cerca l'acqua !  
Iddu ti 'nni po' dari di chidda viva”.

“Comu poi diri sti cosi a' 'mmia  
quannu mancu nu bagghjolu aji cu' tia ?”

“Cu mbivi ‘i st’acqua resta ‘ssitatu”, dissi Gesù,  
“chidda chi dugnu jò stuta ogni siti”.

‘A fimmina rispusi : “damminni tanta, Signuri,  
così no vegnu o’ puzzu ‘a tutti l’uri.  
Dicunu c’avji ‘a vèneri u’ missia, ‘nta sti anni”.

“Jò sugnu, chiddu chi sti sta parrannu “:  
e nci cuntavu tutti i’ so magagni.

Scappavu dda poviredda tutta cunfusa  
dicennu a tutti, amici e vicinatu,  
chi nu profeta o’ puzzu avjia ‘ncuntrato.

Intantu erunu i’ so discepuli rrivati  
prigannulu “Maestru, mancia nu buccuni” :  
“Fari a’ voluntà du patri chi mi mannavu,”  
rispusi Gesù “chistu è u’ me’ manciari”.

Giunsiro ‘nto mentri i samaritani  
e vistiru chi so occhi u’ Ridinturi  
e cridittiru chi era du munnu u’ sarvaturi.